

Sarah Murphy AS

Y Gweinidog Iechyd Meddwl a Llesiant

4 Chwefror 2025

Annwyl Sarah,

Memoranda Cydsyniad Deddfwriaethol ar y Bil Iechyd Meddwl

Yn ei gyfarfod ar 27 Ionawr 2025, trafododd y Pwyllgor Femoranda Cydsyniad Deddfwriaethol Llywodraeth Cymru ar y Bil Iechyd Meddwl.

I lywio ein hystyriaeth o'r memoranda, byddem yn ddiolchgar pe gallech ddarparu rhagor o wybodaeth mewn perthynas â'r cwestiynau a amlinellir yn yr Atodiad.

Byddwn yn ddiolchgar o gael ymateb i'r cwestiynau hyn erbyn 20 Chwefror 2025.

Yn gywir,



Mike Hedges

Cadeirydd



ATODIAD

Cwestiwn 1: Pam ydych yn credu ei bod yn briodol gwneud y darpariaethau hyn ar gyfer Cymru mewn Bil Llywodraeth y DU, yn hytrach nag mewn Bil a gyflwynir i'r Senedd?

Cwestiwn 2: Sut y digwyddodd eich cyfranogiad yn y Bil, a phryd y gwnaed y penderfyniad terfynol i geisio darpariaeth ar gyfer Cymru mewn Bil Llywodraeth y DU?

Cwestiwn 3: Daeth yr Adolygiad Annibynnol yn argymhell diwygio *Deddf Iechyd Meddwl 1983* i ben yn 2018 a chyhoeddodd Llywodraeth y DU Fil drafft yn nodi newidiadau arfaethedig i Ddeddf 1983 yn 2022, na fwrwyd ymlaen ag ef yn y Senedd ddiwethaf. A allech amlinellu:

- i. A wnaeth y Bil drafft a gyhoeddwyd yn 2022 ddarpariaeth ar gyfer Cymru;
- ii. Beth oedd barn Llywodraeth Cymru am y Bil drafft ar y pryd;
- iii. A ydych yn ymwybodol o'r rhesymau dros yr oedi mewn perthynas â'r Bil hwnnw gan Lywodraeth y DU.

Cwestiwn 4: Mae'r Memorandwm Cydsyniad Deddfwriaethol a osodwyd ar 10 Ionawr 2025 yn amlinellu'r negeseuon sydd wedi digwydd rhwng Llywodraeth Cymru a Llywodraeth y DU mewn perthynas â'r Bil hwn.

- i. Pa waith datblygu polisi sydd wedi'i wneud gan Lywodraeth Cymru mewn perthynas ag iechyd meddwl?
- ii. Pa rôl oedd gan Lywodraeth Cymru wrth ddatblygu'r cynigion yn y Bil, a sut mae ei gwaith datblygu polisi wedi'i adlewyrchu yn y Bil?

Cwestiwn 5: Pa dystiolaeth a/neu ddata a gafwyd gan randdeiliaid Cymru neu mewn perthynas â chleifion o Gymru yn ystod y broses o ddatblygu'r Bil, a sut mae hyn yn cael ei adlewyrchu yn y Bil?

Cwestiwn 6: Pa gymalau yn y Bil sy'n ystyried amgylchiadau penodol i Gymru?

Cwestiwn 7: Beth yw eich barn am awgrym bod Llywodraeth Cymru wedi manteisio ar Fil a luniwyd ar gyfer Lloegr?

Cwestiwn 8: Mae paragraff 13 o'r Memorandwm Cydsyniad Deddfwriaethol yn datgan y "Ceir llawer iawn o ddarpariaeth gwasanaethau iechyd meddwl a ddarperir ar y ddwy ochr i'r ffin rhwng Cymru a Lloegr. Byddai peidio â gwneud darpariaethau yn y Bil hwn yn creu risg o fwy o wahaniaethau rhwng y gwasanaethau sydd ar gael yn y ddwy wlad."

Pa ystyriaeth a roddodd Llywodraeth Cymru i ddeddfu ochr yn ochr â Senedd y DU drwy Fil a gyflwynir i'r Senedd, i leihau'r risg o wahaniaethau rhwng y gwasanaethau sydd ar gael yng Nghymru a Lloegr?

Cwestiwn 9: Mae paragraff 15 o'r Memorandwm Cydsyniad Deddfwriaethol yn datgan "Er bod y Bil hwn yn rhoi sylw i faterion datganoledig, mae hefyd yn gwneud darpariaeth o ran materion a gdwir

yn ôl. Rwyf felly yn ystyried bod deddfu drwy Fil gan Lywodraeth y DU yn cynnig y dull gweithredu mwyaf cydlynol ar gyfer y darpariaethau a gyflwynir yn y ddeddfwriaeth hon".

- i. Beth yw'r cydbwysedd rhwng materion a gedwir yn ôl a materion datganoledig yn y Bil?
- ii. Beth yw'r gydberthynas rhwng materion a gedwir yn ôl a materion datganoledig yn y Bil ac i ba raddau ydynt wedi'u cydblethu?

Cwestiwn 10: Pam nad yw Llywodraeth Cymru yn credu bod angen cydsyniad mewn cysylltiad â chymalau 9, 33, 47 ac 48, yn enwedig o ystyried bod Llywodraeth Cymru yn credu bod angen cydsyniad ar gyfer darpariaethau eraill o natur debyg, megis cymalau 34 a 35 (yn ymwneud â throsglwyddo carcharorion)?

Cwestiwn 11: Mae'n ymddangos y bydd yr Ysgrifennydd Gwladol yn cadw'r pŵer i wneud rheoliadau mewn maes datganoledig o dan Gymal 51. Pam y mae hyn yn angenrheidiol, ac a ydych yn fodlon bod yr Ysgrifennydd Gwladol yn cael y pwerau hyn?

Cwestiwn 12: Mae Cymal 52 newydd yn rhoi pwerau cyfatebol i Weinidogion Cymru wneud darpariaeth ganlyniadol i ddiwygio deddfwriaeth sylfaenol mewn perthynas â meysydd datganoledig Cymru. Mae'r pŵer hwn yn cyfateb i'r hyn a ddarperir i'r Ysgrifennydd Gwladol yng Nghymal 51.

- i. A wnaethoch ofyn i'r weithdrefn gadarnhaol fod yn gymwys i'r pŵer Harri'r Wythfed hwn ac os na wnaethoch, pam?
- ii. Pwy fyddai'n gwneud y penderfyniad terfynol ynghylch a fydd y weithdrefn gadarnhaol yn gymwys - Llywodraeth y DU neu Lywodraeth Cymru?
- iii. Pe bai Llywodraeth Cymru am gymhwyso'r weithdrefn gadarnhaol i'r pŵer hwn, a fyddai rhwystr i hynny ddigwydd? Er enghraifft, a yw'r ffaith ei fod yn Fil Llywodraeth y DU yn golygu mai Llywodraeth y DU fydd â'r penderfyniad terfynol ar ddewis y weithdrefn graffu?

Cwestiwn 13: Mae Cymal 53(3) yn datgan na fydd llawer o ddarpariaethau yn y Bil yn dod i rym nes y gwneir rheoliadau i'r perwyl hwnnw gan yr Ysgrifennydd Gwladol.

- i. Pam nad oes pwerau cychwyn i Weinidogion Cymru?
- ii. A oes gennych bryderon am y ffaith nad oes gan Lywodraeth Cymru reolaeth i gychwyn y darpariaethau pan fyddant am wneud hynny, er mwyn sicrhau bod y GIG yng Nghymru a rhanddeiliaid cysylltiedig eraill yn barod i weithredu'r newidiadau hyn ar yr adeg berthnasol?
- iii. Pam nad ydych yn ceisio cydsyniad ar gyfer Cymal 53?

Cwestiwn 14: A allwch esbonio sut y gall pwyllgorau'r Senedd ymgysylltu â Llywodraeth Cymru er mwyn cynnig gwelliannau i'r Bil, os byddant am wneud hynny?

Cwestiwn 15: A yw Llywodraeth Cymru yn bwriadu gofyn am wneud newidiadau eraill i'r Bil?